

杭縣志稿

第三册

市什遷題



杭縣志稿卷三 通紀

通紀二

高宗建炎元年秋八月杭州軍亂帝初立遣勤王兵還諸道杭兵才三百其將得童貫殘兵與俱軍校陳通等謀為變至是軍士縱火殺士曹參軍及副將白均等十二人翌日執守臣龍圖閣直學士葉夢得詣金紫光祿大夫致仕薛昂家殺兩浙轉運判官吳昉轉運判官顧彥成聞變亟奔湖州衆乃推通等七人為首囚夢得逼昂權領州事浙東宣撫翟汝文聞變自將七千人屯西興且奏請浙西兵受其節制戊辰江

南經制使幹辦公事宣教郎鮑貽遜將福建槍杖手二千五百討叛兵丙子翟汝文以兵七千入江先是通等給汝文來受降汝文至城下鮑貽遜等領槍杖手亦至賊不聽命丁丑以龍圖閣學士錢伯言知杭州節制兩浙淮東將兵及福建槍杖手討通庚辰降榜招諭亂兵九月辛丑賊夜劫直祕閣兩浙路提點刑獄公事周格塞殺之執提點刑獄高士曠提刑司所統蘇秀兵遂入杭與賊合時格所部淮南兵不肯從盡為浙兵所害賊又刺城中百姓為兵復以金帛誘諸郡不逞使據城相應翟汝文慮變生肘腋遂引

兵還越州，賊勢益熾。十月，直龍圖閣知秀州趙叔近招杭賊陳通降之。十一月，叔近言杭賊今已就招，請授以官，許之。帝用劉珣、許景衡言，乙卯寢其命。十二月辛酉，御營使司都統制王淵入杭州。初，淵至秀州，下令治兵十日，乃行。通等聞之，緩為之備。及是，淵與統制官張俊馳至城下，傳呼趙龍圖來。通出不意，遂出迎。淵諭以朝廷遣賜告身，通等皆喜。淵俊入州治，命士兵分守諸門。淵召其首三十人至庭下，遽執之。通呼曰：「已受招，何為？」乃爾。淵曰：「我受詔討賊，不知其他，併執其餘黨，悉腰斬之。」百姓相賀。

宋史高宗紀續通鑑宋紀

是年置安撫使領杭州

宋史地理志

三年二月三日晚金人入揚州城帝至鎮江癸丑召

宰執從官諸將對宅堂計事議去留都統制王淵入

對言暫駐鎮江止捍得一處若金自通州渡江先據

姑蘇將若之何不如錢塘有重江之阻帝意遂決即

上馬行丙辰帝次平江府

集英殿修撰衛膚敏言餘杭地狹人稠區區一隅終

非可都之地自古帝王未有作都者惟錢氏節度二

浙而竊居之蓋不得已也今陛下巡幸乃欲居之其

地深遠狹隘欲以號令四方恢復中原難矣為今

之計莫若暫園於錢塘徐詣建康上頗納其言

辛

酉至臨平鎮壬戌駐蹕杭州以州治為行宮顯寧寺

為尚書省癸亥朝羣臣於行宮降詔罪已求直言令

杭州守臣具舟往常州迎濟衣冠軍民家屬

續通鑑
宋紀

三月扈從統制苗傅劉正彥作亂先是苗傅自負世將以王淵驟得君頗缺望而劉正彥嘗招降羣盜丁進等以賞薄怨望二人因相結時內史康履藍珪恃恩用事履尤妄作威福凌忽諸將諸將嫉之及王淵入樞府溥等疑其由內侍以進愈不平遂與中大夫王世修及其屬王鈞甫馬柔吉張遠等謀先斬淵然後殺宦者乃給淵以臨安縣有盜意欲使淵出其兵於外康履得黃卷小文書池賊謀以告淵日暮淵伏兵天竺

是夜城中驚惶居民杜門不敢出皆通夕不寐賊黨亦伏兵城北橋

下癸未淵退朝正彥手殺淵以兵圍履第分捕內官凡無鬚者皆殺揭淵首引兵犯闕中軍統制吳湛守宮門潛與傅通導其軍入知杭州康允之聞變率從官叩閣請帝御樓撫諭日將午帝登樓傅等望見黃蓋猶山呼而拜帝憑欄呼傅等問故傅屬聲對曰陛下信任中官賞罰不公軍士有功者不賞內侍所主得官黃潛善汪伯彥誤國至此猶未遠竄王淵遇賊不戰首先渡江因交康履乃除樞密臣自陛下即位以來功多賞薄臣已將王淵斬首中官在外者皆誅乞康履擇誅之以謝三軍帝曰潛善伯彥已降黜履

擇當重與降責。卿等可歸營。傅曰：天下生靈無故肝腦塗地，止緣中官擅權。若不斬履，擇臣不還營。帝不得已，命湛執履與之。傅即於樓下腰斬履，梟首與淵首相望。

其後并捕擇斬之。編管藍珪於遠州。

帝諭傅等歸營。傅等進曰：

陛下不當即大位。將來淵聖皇帝來歸，未知何以處之。帝命尚書右僕射朱勝非縋樓下，曲諭之。傅請隆裕太后同聽政，及遣人使金議和。帝許之，即下詔請隆裕太后垂簾。傅等聞詔不拜，曰：自有皇太子可立。况道君皇帝已有故事。勝還白帝，帝曰：朕當退避。但須太后手詔也。乃遣門下侍郎顏岐入內，請太后御樓。

太后至，帝立楹側。太后因乘肩輿下樓出門，見傅等，諭之曰：「自道君皇帝任蔡京、王黼，更祖宗法度，童貫起邊事，所以招致金人之禍，豈關今上皇帝事哉？皇帝初無失德，止為黃潛善、汪伯彥所誤，今已竄逐，統制豈不知之？」傅等對曰：「臣等必欲太后為天下主，奉皇子為帝，太后曰：『吾以一婦人抱三歲兒，決事何以令天下？』敵國聞之，豈不轉加輕侮？」傅等不從，曰：「三軍之士，自早朝至今未飯，事久不決，恐生他變。」顧勝非曰：「今日政須大臣果決，相公何無一言勝非不能對？」傅等語言益迫，太后還入門，帝遣白以事無奈何，須

禪位勝非請下樓面詰二兇帝乃揮左右稍卻附耳
曰朕今與卿利害正同當為後圖圖之不成死亦未
晚遂命勝非以四事約束傅傅等皆曰諾帝乃即坐

作詔禪位於皇子而請太后同聽政宣詔畢傅等麾

其軍退移屯祥符寺

方事之未決也康允之奏恐軍士乘機攘殺請出門慰撫乃見

傅正彥告以故正彥以甲馬二十甲士授之允之周行市衢抗人賴以安堵是日帝幸顯

寧寺甲申皇子尊即位太后垂簾降赦尊帝為睿聖

仁孝皇帝以顯寧寺為睿聖宮改元明受加傅為武

當節度使正彥為武成軍節度使丙戌赦至平江府

禮部侍郎張浚知有變不拜丁亥至江寧安撫別置

使呂頤浩遺浚書痛述事變浚乃舉兵辛卯浚遣進士馮轡赴行在請帝親總要務復抵書馬柔吉王鈞甫宜早反正以解天下之惑浚既遣轡即檄諸路約呂頤浩會平江癸巳浚命節制司參議官辛道宗措置海舶丙申御營平寇將軍韓世忠至平江即欲進兵浚曰已遣馮轡甘言誘賊矣投鼠忌器不可太亟五軍制置使劉光世引兵會頤浩前軍統制王德用救亂之軍當百舍一息請先率由桐川趨餘杭光世以諸將議已定不從戊戌世忠發平江道宗與陳思恭亦自華亭進發浚復遣人責賊以大義諭以禍福

期雖死無悔。傅等初聞浚集兵，未之信。及得浚書，始
悟見討。辛丑，傅遣其弟翊與馬柔吉將赤心隊及王
淵、舊部曲駐臨平，以拒勤王之師。檄杭州集保甲，選
器械，扃城門，塞河道。康允之悉不為行。壬寅，頤浩至
平江，與浚草檄告四方討賊。癸卯，張浚發平江，劉光
世繼之。頤浩又遣統制官張道率兵三千屯湖州。安
吉縣賊亦遣兵三千屯小林。丙午，頤浩浚以大兵發
平江。丁未，次吳江。奏乞建炎皇帝還即尊位。朱勝非
召傅正彥至都堂議復辟。傅等託旨請頤浩單騎入
朝。頤浩奏所統軍士忠義所激，可合不可離。傅等恐

懼遂朝睿聖宮。夏四月戊申朔，帝還宮。尊太后曰隆祐太皇太后。嗣君為皇太子。己酉，思恭船趨錢塘。城上望見火炬，遣人縋城探之。庚戌，復建炎號。命浚知樞密院事。是日，頤浩浚軍次臨平。苗翊馬柔吉負山阻河為障，中流植鹿角，梗行舟。世忠舍舟力戰，浚繼之。光世又繼之。軍少卻。世宗叱其將馬彥浦揮兵以進，塗濔，斬不得逞。世忠復舍馬，操戈而前。令將士曰：今日當以死報國，而不被數矢者皆斬。頤浩被甲立水次，出入行伍間督戰。於是士殊死鬪，轉至剪刀山。賊列神臂弓持滿以待。世忠瞋目大呼，挺刃突前，賊

辟易，矢不及發，遂敗。傅正彥遣兵援之，不能進。勤王

兵進北關，朱勝非命諸將集兵皇城門外，城中震恐。

康允之謂勝非不若使人諭二凶速引兵去。是夕傅

正彥引精兵二千人開湧金門以出，命其徒所在縱

火。遇天大雨，火不能起。遂夜遁。尚書省檄諸道捕傅

等。世忠、浚、光世馳入城，至行宮門。世忠欲入，其下張

介曰：「不可。雖賊已去，尚未可知。」闔者以聞，帝步至宮

門，握世忠手痛哭。光世、浚繼至，並見於內殿。辛亥，頤

浩、浚引勤王兵入城，都人夾道聳觀，以手加額。是月

江寧秋七月辛巳，韓世忠軍還，執苗傅、劉正彥、苗翊、

詔都堂審驗，磔於建康市。續通鑑宋紀，宋之苗傅

傳繫年要錄

中興小紀

七月升杭州為臨安府曰行在所錢塘仁和兩縣並

升赤

文獻通考宋史地理志

冬十月帝至臨安

從樓焘言因長江為險阻權都吳會以立國力于是帝如臨安不復

議防淮矣

留七日復如越州

時金人分兵自滁和入江東自蕪黃入江西通鑑輯覽

十二月金人犯臨安知錢塘縣朱躒請戍千秋獨松

二嶺守臣浙西同安撫使康允之不聽癸未金師完

顏宗弼自安吉進兵過獨松關曰南朝若以兵數百

守此吾豈能遽度哉乙酉宗弼侵臨安濟南尹錫默

阿里河北西路兵馬都總管烏雅富埒琿先驅朱蹕率弓手土軍二千趨餘杭路伏兵邀擊取甲士三十人阿里使諸軍去馬搏戰伏兵皆敗逼死於水蹕兩中流矢傷甚猶叱左右負已擊敵康允之未知為金人遣將迎敵於湖州市得二級視之曰金人也遂棄城遁保赭山時直顯謨閣劉晦自楚州赴召在城中軍民推之以守府吏岳仲瑑募勇士三百人推尉曹十將金勝祝威為首領迎敵死戰己丑臨安陷初宗弼既圍城遣前知州李儔入城招諭儔與劉晦善至是削髮左衽而來二人執手而言儔歎歎不能止有

倡言晦欲以城降金者軍民因殺晦是晚城破朱躡在天竺山亦遇害金勝祝咸集彫兵據葛嶺編竹覆泥為塗以誘敵翌日敵騎馳至陷入湖中宗弼大駭退循赤山執民為鄉導由南壁而入勝咸被執死之宗弼聞帝在明州使阿里富埒瑄具舟錢塘江知越州李鄴邀之三捷既而衆寡不敵以城降兩浙宣撫使周望遣統制官陳思恭張俊按即小張俊統兵規復臨安敗於秀州又敗於臨安東北四年春二月阿里富埒瑄自明州引兵還初宗弼留臨安聞浙西制置使韓世忠自江陰趣鎮江恐邀其後是月庚辰宗弼欲

兵於吳山七寶山遂縱火三日夜燿焰不絕癸未火
息甲申縱兵大掠且束裝丙戌退軍以鹵掠輜重不
可遵陸乃由蘇秀取塘岸行先是成州團練使陸漸
迎降宗弼以為臨安府兵馬鈐轄漸勸宗弼括金銀
焚臨安因從軍北去時李儔李鄴皆在軍中宗弼攜
之以北續通鑑咸淳志金史太宗紀宗弼傳烏雅富琦瑋傳西湖游覽志宋史朱瑛傳

六月己卯罷臨安府守臣兼浙西同宣撫使續通鑑

紹興元年十二月己卯詔兩浙分東西路置提點刑
獄高宗本紀

二年春正月帝如臨安通鑑輯覽

秋七月甲申分浙東浙西兩路設沿海制置司

呂頤浩言

敵舟從大海北來拋洋直至定海縣此浙東路也自海由通州入料角放洋至青龍港又沿流至金山村

海鹽縣直泊臨安府江岸此浙西路也萬一有警制置一使必不能照應

續通鑑

四年冬金人犯淮甸帝從尚書左僕射趙鼎請遂詔

親征丁丑以孟庾為行宮留守戊戌發臨安府晚泊

臨平鎮韓世忠捷奏至壬寅帝次平江十二月金人

自淮引退

繫年要錄宋史本紀臨平記補遺咸淳志

五年春正月從參知政事留守孟庾請車駕還臨安

丁丑帝發平江二月辛巳宿臨平鎮壬午帝至臨安

繫年要錄宋史臨平記補遺

三月丁酉復移浙西安撫於臨安府以駐蹕之地理宜增重事權故也續通鑑

六年秋劉豫入寇九月丁卯朔帝親征發臨安府舟

宿臨平鎮於舟中與宰執論岳飛之捷癸酉帝次平

江七年正月移蹕建康繫年要錄宋史臨平記補遺

八年二月癸亥帝發建康丁丑次臨平鎮戊寅至臨

安始定都矣是時趙鼎罷相而秦檜用事和議寢決不復議親征者二十餘年偏安之局至此

遂限此本紀臨平記補遺

十二年八月辛巳帝奉迎皇太后韋后於臨平鎮用

黃麾半仗二千四百八十三人壬午皇太后還慈寧

宮戊子帝服黃袍乘輦詣臨平奉迎梓宮登舟易總服百官皆如之己丑徽宗皇帝顯肅皇后及懿節皇后梓宮皆至行在寓於龍德別宮

續通鑑

案十一年十一月宋金和議成宋得者祇生母

韋氏及徽宗鄭邢二后等梓宮而已金則畫地

以淮水為界並求唐鄧二州及陝西餘地

割商

地棄和尚方山二原以大散關為界歲幣銀絹各二十五萬高宗

從其請而奉表請臣於金然猶美其名曰為親

屈也乃必殺岳飛罷韓世忠調劉琦知荆南詔

吳璘等班師還鎮卒之豪傑灰心人情萎靡終

宋之世一蹶不復振曾是以為孝乎此越王句踐明之于謀所以獨有千古矣

十三年十二月己酉金賀正旦使副左金吾衛上將軍右宣徽使完顏華秘書少監馬諤見於紫宸殿翌日游上天竺寺賜香及齋筵冷泉亭酒果十四年正月二日集江下觀潮六日朝辭送饗賜宴七日行自

是正旦率如此例

其後上以使入市買方物恐或擾民每北使至館即出內庫錢萬緡

付都亭驛遇使人市物隨即取賣自是以為例續通鑑宋紀中興小記

五月己巳金主始遣驃騎大將軍安國軍節度使烏延和通議大夫行大理寺少卿孟浩來賀正旦節幸

未上壽於紫宸殿，特就驛宴之，仍以執政官押伴，續
繼

紹興間，全國賀天申節，賀正旦，人使來及回程，賜酒

果御筵於臨平赤岸

臨平記補遺

案劉才邵樹溪居士集載，賜全國使人，口宣教
語，其在臨平鎮赤岸，凡八條，年月無可稽，姑附
於此。

三十一年九月，金元顏亮大舉入寇，先是亮嘗密隱
畫工於奉使中，俾寫臨安湖山以歸為屏，而圖已之
像，策馬於吳山絕頂，題詩其上，有立馬吳山第一峯

之句。至是亮發自南京，戎服乘馬，具裝起行，衆六十

萬，號百萬，將自清河口入淮東，遠近皆震。十月，帝從

左僕射陳康伯請，定議親征，尋以楊存中為御營宿

衛使

丙寅，浙西馬步軍副總管李寶遇金師，船於膠西縣陳家島大敗之。十一月丙子，中書舍人督

視江淮軍馬府參謀軍事虞允文大敗金軍於采石。甲午，亮趨瓜州。時金人已立雍為帝，改元大定。乙未

黎明，金將耶律元宜等率衆殺亮於龜山寺。十二月戊戌，金都督府遣人持檄鎮江軍中議和。

戊申，帝發臨安府，舟泊臨平鎮。三十二年正月壬申，

帝至建康。

御史吳芾言：建康可以控帶襄漢，經略淮

西北之勢，不從。二月癸卯，帝發建康。甲寅，次臨平鎮。乙

卯，至臨安府。

通鑑輯覽、宋史本紀、續通鑑、臨平記補遺。

三月壬子金報登位使驃騎上將軍元帥府左監軍高忠建副使通議大夫尚書禮部侍郎張景仁見於紫宸殿既朝留蹕中凡五日觀濤天竺之游皆罷之至是面投報書用敵國禮忠建等捧受如儀四月遣洪邁等充大金國賀登寶位使七月遣劉珙報金以登位皆責舊禮不納而還

續通鑑

案孝宗隆興二年遣國信所通事王抃使金誓目畧同紹興惟世為叔侄之國減銀絹五萬易歲貢為歲幣易表稱書史臣以為金人易宋之心寔異於前日然長此晏安不為奮發圖強之

計終亦同盡而已

六月帝傳位于太子七月追復岳飛官以禮改葬官

孫六初飛死獄卒隗順負其屍葬之九曲叢祠至是

懸賞購其瘞順子告於官而改葬之墓在錢塘縣棲

霞嶺下通鑑

案湖上岳墳為孝宗即位初改葬故特紀之

孝宗乾道四年秋七月臣僚言臨安府風俗自十幾年來服飾亂常習為邊裝聲音亂雅好為北樂臣竊傷悼中原士民延首企踵欲復見中原之制度者却不可得而東南之民反效於異方之習而不自知甚

可痛也。今都人靜夜，十百為羣，吹鷓鴣，撥洋琴，使人黑衣而舞，眾人拍手和之，傷風敗俗，不可不懲。詔從之。續通鑑

七年夏四月辛未，皇太子領臨安府尹，置少尹。

九年四月己丑，皇太子解臨安尹事。二十七日，臨安

府知通以下並復置。

咸淳志，孝宗本紀。

淳熙四年十二月乙亥，大閱殿步兩司諸軍于茅灘。

續通鑑

十年夏四月丙申，詔臨安係駐蹕之地，本府屬縣民

戶身丁錢，可自淳熙十一年為始，更與蠲放三年。此自

歷紹熙慶元嘉泰臨安民身丁錢三年者凡五次至開禧元年十二月永除續通鑑

寧宗嘉泰元年三月戊寅行都大火四日乃滅焚居民五萬三千餘家命臨安府察姦民縱火者罪以軍法出內府錢十六萬米六萬餘斛賜被火之家續通鑑

案此後嘉泰三年嘉定元年四年紹定四年雍熙元年臨安均續有大火甚者太廟三省六部御史臺祕書省玉牒所俱燬焚民舍五萬八千餘家繼又焚民廬至十五萬城中廬舍十燬其七百官多僦舟以居省院部皆寓治驛寺豈火政之不修抑蹈常襲故不於建築上引圖改善

歟然錢塘南限江海西抱湖山而行都之宮殿
郊廟以及部院省寺衙局官宇勳臣外戚之邸
第苑囿又星羅棋布其間地狹人稠燎原之禍
一發遂不可遏於是民間之財產國家之元氣
益彫傷盡矣

嘉定二年五月戊戌羅日愿謀為變伏誅日愿以策
干韓侂胄借補訓武郎充忠義軍統制侂胄既誅

按

侂胄以開禧間主伐金其黨有獲罪者詞連日愿日
兵敗被誅函其首畀金

愿不自安潛結黨羽欲伺史彌遠起復過江百官迎
謁於浙江亭舉火為號盡殺宰以下官突入大內脅

下詔書部分已定守闕進勇副尉景德常知其事投

匭上變日愿磔於市補德常為武德郎

續通鑑

理宗紹定三年閏月癸酉逃卒穆椿竊入皇城焚御前甲仗庫衛士捕得之磔於市時李全欲銷朝廷兵備故遣椿為亂於是先朝甲仗燒燬殆盡

續通鑑

端平元年夏四月史嵩之遣使以孟珙所獲金哀宗遺物及寶玉法物并俘囚張天綱完顏海罕等獻於行都丙戌備禮告於太廟藏金哀宗骨於大理獄庫加孟珙帶御器械江海以下論功行賞

十二月己卯蒙古遣王檝

來責敗盟辛卯遣鄒仲等報謝自是河淮之間無寧息日矣

嘉熙四年春正月臨安大饑饑者奪食於路市中殺人以賣隱處掠買人以微利日未晡路無行人秋七月子出封樁庫婚錢二十萬貫賑臨安饑民續通鑑

案是年知寧國府杜範君還都首言旱暵薦臻人無粒食褚券猥輕物價騰踊行都之內氣象蕭條左浙近輔殍死盈道流民充斥剽掠成風復上疏言倉廩匱竭月支不繼斗粟一千其增未已富戶淪落十室九空甚而闔門餓死相率投江里巷聚首以議執政軍伍諍語所不忍聞而見於京師衆大之區當時臨安情狀慘可知

已

寶祐二年六月壬寅罷臨平鎮稅

續通鑑

六月二日蒙古主自將南侵由西蜀以入先遣張柔

從皇弟呼必賚攻鄂趣臨安

續通鑑

開慶元年十月時邊報日急臨安圍結義兵勇招募

新兵增築平江紹興慶元城堡朝野震恐內侍董宗

臣請帝遷都四明以避鋒鏑皇后請留蹕帝乃止

續通鑑

鑑

度宗咸淳八年八月詔平章軍國重事賈似道十時

一朝時蒙古攻圍襄樊甚急似道日坐葛嶺起樓閣

亭榭作半閒堂日肆淫樂與故博徒縱博人無敢窺

其第者酷嗜寶玩建多寶閣一日一登玩自是或累

不朝有言邊事者輒加貶斥

九年十一月蒙古建國號曰元十年六月元主

命諸將南伐且數賈似道負約罪七月元巴延出師陞辭

續通鑑

帝焜德祐元年三月壬申朔殿前都指揮使韓震復

請帝遷都如賈似道之議

按似道時以有罪免職

陳宜中欲示

已非似道黨乃召震計策伏壯士袖鐵椎擊殺之震

部將李大時等叛攻嘉會門射火箭至大內急發兵

捕之皆散走携震母及諸子出奔元軍

庚寅元兵既迫臨安戒嚴

同知樞密院曾淵子等數十人皆適朝中為之蕭然

續通鑑

冬十月壬戌元巴延至鎮江分軍為三道阿喇罕帥
右軍自建康出廣德泗安鎮趣獨松董文炳帥左軍
出江入海以范文虎為鄉導取道江陰趣溇浦華亭
巴延及阿塔哈將中軍以呂文煥為鄉導趣常州期
並會于臨安十一月戊寅元兵入廣德軍泗安陳宜
中倉皇發臨安民年十五者皆籍為兵號武定軍召
文天祥自平江入衛甲申元巴延會兵圍常州攻二
日城破命盡屠其民己丑元兵破獨松關隣疆守者
皆望風遁朝廷大懼十二月丁未巴延入平江張世
傑未至城已破乃以兵自衛

續通鑑

二年

元世祖至元十三年
宋益王景炎元年

春正月諸關兵皆敗知嘉

興府劉漢傑以城降元元兵圍安吉州知州趙良淳與提刑徐道隆同守及元兵迫臨安道隆召入衛良淳率衆獨守夜焚舍陴上既而戍將吳國定開門納元兵良淳閉關自經道隆未至臨安元兵追及之一軍盡沒道隆投水死乙亥遣監察御使劉巴山如巴延軍奉表稱臣上尊號歲貢絹銀二十萬兩乞存境土以奉蒸嘗且約巴延會長安鎮以輸平元巴延至長安鎮陳宜中違約不往議甲申巴延進次皋亭山阿剌罕董文炳之師皆會游騎至臨安北關文天祥

張世傑請移三宮入海而已率衆背城一戰宜中不許白太皇太后遣監察御史楊應奎上傳國璽以降表稱宋國主焜謹奉太皇太后命削去帝號以兩浙福建江東西湖南二廣四川兩淮見存州郡悉上聖朝為宗社生靈乞哀請命巴延受之遣使召陳宜中出議降事而使囊嘉特奉璽表赴上都是夜宜中遁歸温州之清澳乙酉元巴延下令禁軍士入城違者以軍法從事復遣呂文煥齎榜諭臨安中外軍民俾安堵如故時三司衛兵白晝殺人小民乘時剽殺令下乃止息戊子命文天祥同吳堅謝堂賈餘慶使元軍見巴延於

臨平明因寺。巴延見天祥舉動不常，疑有異志，留之軍中。且以其降表不稱臣，仍書宋號。遣程鵬飛、洪君祥偕賈餘慶來易之。駙馬都尉楊鎮等奉益王、廣王自嘉會門出。楊淑妃、秀王與擇偕行，渡浙江而南。巴延聞之，遣范文虎將兵追之。楊鎮得報即還曰：我楊將死於彼，以緩追兵。楊亮節等遂負二王及楊淑妃，徒走匿山中。七日，統制張全以兵數十人追及，遂同走溫州。續通鑑

二月，巴延承制，以臨安為兩浙大都府，命蒙古岱、范文虎入城治都督事。又令程飛取太皇太后手詔，及三省樞密院吳堅、賈餘慶等檄諭天下降附。巴延進

屯湖州府復令張惠阿喇罕董文炳張弘範索多等

封府庫收史館祕省圖書及百司符印告敕罷官府

及侍衛軍

立兩浙宣慰司于臨安兼知臨安府事續通鑑元史本紀

丁未元諭臨安新附府州司縣官吏軍民人等凡歸

附前罪悉從原免

凡典故文字并戶口版籍收拾儒醫僧道通曉天文曆數并山林隱

逸名士所在官司以名聞名山大川寺觀廟宇并前代名人遺迹不許拆毀鰥寡孤獨不能自存之人量

給加贍

三月丁卯元巴延入臨安城建大將旗鼓率左右翼

萬戶巡視觀潮于浙江又登獅子峯觀臨安形勢遣

管如德招諭諸郡福王與芮自紹興至巴延深慰之

明日發臨安按塔哈孟祺等入宮宣詔趣帝及全太后入覲帝與太后肩輿出宮太皇太后以疾留內苑及沂王乃猷度宗母隆國夫人黃氏并楊鎮高堂高應松庶寮劉哀然等及三學士諸生皆行皆乘舟自謝村經平江鎮江渡江北上續通鑑汪元量水雲集

元巴延北還承制留阿喇罕董文炳經畧閩浙以蒙

古岱鎮浙西索多鎮浙東

遣江西都元帥宋都達木移軍與李恒呂師夔阿喇

罕董文炳同取未下州縣以追二王續通鑑

五月福王與芮從子孟采謀舉兵紹興事泄被執至

臨安范文虎驅出斬之過太廟呼曰太祖太宗之靈

何以使孟采至此杭人為之隕涕

是月陳宜中張世傑等奉益王昀即

帝於福州府改元景夫衛娶諸州復為宋守元董文炳謂索多曰嚴州不守臨安必危公往鎮之未十日諸州聯兵來攻索多戰卻之遂破婺衢二州續通鑑

六月元置江淮行省于揚州臨安府屬之兩浙宣慰

司大都督府並罷

元史世祖本紀

案元又有行御史臺行宣政院按察使置徒不常茲於行省之外不備載焉

八月太皇太后謝氏以病久留臨安至是元遣人自宮中舁其床以出同侍衛七十二人北赴大都降封壽春

郡夫人續通鑑

元世祖至元十四年宋景炎二年十一月元命中興尚繼

論中外江南既平行在宜曰杭州

續通

十五年

宋景炎三年

十一月元江南釋教總統嘉木揚喇

勒智

舊作楊璉真加

以是月役頓蕭山發宋寧宗理宗度宗

場后四陵

得寶玉極多裁理宗項以為飲器兼骨草莽間山陰唐珏邀里中少年造數木函刻

紀年一字為號夜往拾遺骸詰朝來集

既而嘉木揚喇勒智復發徽高

孝光四陵及諸后陵

太學生粟嘉林景熙託為正高孝兩朝骨貯函函

所得之骨並瘞蘭亭山南移常朝殿冬樹植其上以識

未幾嘉木揚喇勒智

令哀諸陵骨雜置牛馬枯骸中建白塔於故宮名曰

鎮南以厭勝之杭人悲感不忍仰視蓋珏等事秘抗

人未有知者

是年四月宋景炎帝殂眾立其弟昀改元祥興明年二月崖山兵潰陸秀夫負

帝昺入海死之宋亡
續通鑑續綱目

是年元改安撫司為杭州路總管領司二

宋南渡設九廂元至

元十四年分為四隅錄事司泰州一縣八錢塘上仁

定二年併為左右二錄事司

州一縣八錢塘上仁

和上分治城下

元史地理志

十七年四月立杭州路金玉總管府

元史世祖本紀

二十年定江淮以南三萬戶以上曰上縣上縣秩從

六品達魯花赤一員尹簿封各一員典史二員

按錢塘仁

和皆上縣元史百官志

二十一年二月自揚州遷江淮行省來治于杭改曰

江浙行省統路三十府一

元史地理志百官志

以伊大利人馬

哥博囉為江浙行中書省樞密副使在任凡三載時時往

京師即杭州采風問俗筆之日記記稱繁華富麗及天

然景緻之多當推為天下第一名都京師之人喜和平不尚爭競人不習兵而家藏亦無兵器入其市無詬誶聲交易多信實用大可汗之紙幣然其人疾視軍人尤恨大可汗駐防之兵蓋彼等初為自治之民今則隸屬他人治下於心不能平耳一老宮監導往觀故宮至則正殿為韃靼總督行轅而所謂後宮別殿者僅餘敗址頽垣而老監猶能言其故時妃嬪所居至此不勝今昔之歎魏昌譯馬哥博囉遊記

案馬可遊杭曾任江浙行省樞密院事當在二

十四年再改江淮省以前故附於此又鄭元祐

遂昌雜錄載江淮省改江浙省自揚州遷錢塘

尤公因陞平章每出見杭士女出遊仍故都遺

風前後雜沓。公必停輿或駐馬。戒飭之曰。汝輩尚憚憚睡耶。今日非南朝矣。勤儉力作。尚慮不能供徭役。而猶若是惰游手。當時錢塘民俗如是。並附記焉。

二十三年七月。庚午。江淮行省蒙古岱言。今置省杭州。兩淮江東諸路財賦軍實皆南輸。又復北上。不便。省徙揚州。便。從之。二十四年正月。復改江浙省為江

淮行省。

元史世紀

二十五年二月丙寅。嘉禾揚喇勒智言。以宋宮室為塔一。為寺五。已成。詔以水陸地百五十頃養之。辛巳。

以杭州西湖為放生池

續通鑑

是冬宋供奉汪元量歸杭州

由燕京歸

且言謝太后臨沒

遺言欲歸葬紹興全太后為尼瀛國公

即帝

學僖號

木波講師遺老聞之有泣下者

續通鑑

二十六年二月癸亥徙江淮省治杭州

元史世祖本紀

二十七年庚辰杭州賊唐珍等伏誅十一月戊申江

淮行省平章布琳濟岱言杭州行在諸司府庫所在

宜置四萬戶府錢塘扼海口舊止戰船二十艘故海

賊時出奪船殺人宜增置百艘則盜賊不敢發從之

元史本紀
續通鑑

二十八年十二月庚辰改江淮行省為江浙等處行

中書治杭州

元史本紀

二十九年二月庚辰御使大夫伊實特穆爾中丞崔或等言訥蘇喇鼎默琦實都王巨源黨比僧格恣為不法銜命江南理算者皆嚴急輸期民至嫁妻賣女禍及親鄰維揚錢塘受害最慘無故而戕生者五百餘人皆僧格及兇黨之為此三人既已伏辜宜依條論坐以謝天下從之

續通鑑

順帝至正二年以博爾爾濟布哈為江浙行省左丞相行至淮東聞抗城大火燒官廨民廬幾盡疾馳赴

鎮即下令被災者二萬三千餘戶給鈔錠。奠死者

亦如之。給月米一斗。幼稚減其半。又請減兩課為錢千二百五十緡織

坊減原額之半。軍器漆器權停一年。廷從之。續通鑑

十二年秋七月庚辰。蘄水徐壽輝將項普略引兵有

徽。饒犯昱嶺關。攻杭州。城中倉猝無備。參政樊執敬

遽上馬率衆出。中途與賊遇。射殺賊四人。賊逐之。復

射死三人。已而賊來益衆。填咽街巷。且縱火。衆皆潰

去。執敬益奮力斫賊。因中創死。僕田也先馳救之。亦

中槍死。時董搏霄從。江浙平章嘉瑋攻安豐。乘勝攻

濠州。命移軍援江西。遂渡江至德清。而杭州已陷。嘉

瑋問計。搏霄曰：賊見杭州子女玉帛，必縱掠不暇。為備，宜急攻之。遂進兵薄杭州城，迎敵至鹽橋。搏霄麾壯士突前，諸將相繼夾擊，凡七戰，追殺至清和坊。奔接待寺，塞其門而焚之，賊皆死。遂復杭州。餘杭、武康、德清次第以平。搏霄亦受代去。賊之入城也，偽帥項葵、楊蘇一屯明慶寺，一屯北關門妙行寺，稱彌勒佛出世，以惑眾，不殺不淫，招民投附者，注姓名於籍，庫中金銀悉輦以去。平章嘉瑋自湖州統軍回，舉火焚城，傷殘殆盡，誅附賊充偽職者范縣尹等。里豪施尊禮，顧八迎敵，官軍劓於市，家產并没入官。省都事以

下坐失守城池罷黜不叙省官復任如故賊復自昱嶺間寇於
潛行者乃假擣霄為參知政事復提兵討之擣霄即
日引兵至臨安分兵守新溪而以大軍進遇賊大破
之遂復於潛縣治既又復昌化及昱嶺關賊又有犯
千秋關者擣霄還軍守於潛復遣人執白旗登山伺
賊而伏兵城外約旗動炮即發已而旗動炮發兵盡
出斬首數千級遂復千秋關賊復攻獨松百丈幽嶺
三關擣霄乃先以兵守多溪多溪三關要路也既又
分為三軍一出獨松一出百丈一出幽嶺然後會兵
擣賊巢遂乘勝復安吉賊帥梅元等皆降明日進兵
廣德克之續通鑑

案方輿紀要昱嶺山在昌化縣西七十里去徽

州府一百二十里嶺高七十五丈地勢險阻舊

設關於此千秋嶺在於潛縣西北五十里天目

山支麓接江南寧國縣界嶺高三百丈其南尤

險狹獨松嶺在餘杭縣西北七十五里有關在其上嶺路險狹東南直走臨安西北則道安吉趨廣德幽嶺關在孝豐縣東南三十里幽嶺上又有百文關在餘杭縣西北八十里百文嶺上與安吉縣分界此五關雖非杭縣轄境要為杭城外圍門戶歷代兵事自江南間道襲杭者往往由此故附及焉

十六年二月張士誠既陷平江嘉興地當衝要有司告急驛使不絕於道江浙丞相達實特穆爾兵少策無所出檄苗軍師帥楊鄂勒哲來守嘉興楊鄂勒哲

取道自杭以兵劫達實特穆爾使陞己為本省參事
達實特穆爾遂填募民入粟空名告身予之

續通鑑

三月丁酉立行樞密院於杭州命浙江行省左丞相
達實特穆爾兼知行樞密院事節制諸軍省院等官
並聽調遣

續通鑑

五月楊鄂勒哲以數萬衆屯於嘉興先鋒以七千衆
屯王江涇商旅不行軍容甚盛張士德遂不敢取道
嘉興乃自平望烏墩直搗杭州江浙丞相達實特穆
爾恃楊鄂勒哲兵強漫不為備寇至城遂陷平章政
事遵達實哩戰死達實特穆爾遁入富陽鄂勒哲乃

以苗軍及官軍分為三路。蔣英從大麻塘棲。董旺從
硤石。長安自率劉震、朱誠從海鹽黃灣而進。呂才、呂
昇屯守嘉興。士德知鄂勒哲分路而來。遂應接不暇。
一敗於皋亭，再敗於謝村。三敗于夾城巷。賊水從德
清。陸從海鹽遁去。遂復杭州。達實特穆爾乃還。續通鑑

十二月，義兵元帥方家努以所部軍屯杭城之北關。
勾結同黨相煽為惡，劫掠財貨，白晝殺人。民以為患。
江浙行省平章慶圖言于丞相達實特穆爾曰：我師
無律，何以克敵？必斬方家努，乃可出師。達實特穆爾
遂與慶圖入其軍，斬首以徇。民大悅。續通鑑

十七年八月張士誠使前江南行臺中丞曼濟哈雅為書請降於江浙行省丞相達實特穆爾辭多不遜達實特穆爾執不可士誠使者往返訖無就士誠乃遣其偽隆平太守周仁親詣浙江省堂具陳自願休兵息民之意鄂勒哲固勸納降乃許之遂授士誠太尉改隆平府復為平江路士誠遷居府治雖奉正朔而甲兵錢穀皆自據如故

鑒 緒通

十八年八月浙江行省丞相達實特穆爾陰約張士誠以兵攻揚鄂勒哲鄂勒哲倉卒不及備遂自殺其眾遂潰初鄂勒哲築營德勝堰周圍三四里子女玉

帛在焉。達實特穆爾惡之。士誠素欲圖鄂勒哲。遣其部將史文炳往杭州謁鄂勒哲。相見甚歡。自是約為兄弟。及士誠與達實特穆爾合謀。文炳率衆圍之。鄂勒哲乘城拒戰十日。力盡自經死。其弟巴延亦自殺。

續通鑑

十九年七月。以張士信為江浙行省平章政事。

九月以方

國珍為江浙行省平章政事

續通鑑

冬十月。張士信大發浙西諸郡民築杭州城。分為三番。以一月更代。皆裹糧遠役。而督事長吏復藉之酷烈。鞭朴箠楚。死者相望。自七月興工。至是月始畢。僚

屬為立碑以紀功

續通鑑

案元既取宋禁天下修城以示一統於是杭州內外城日為居民所平張氏築城周六千四百丈有奇高三丈厚視高加一丈觀舊址則東北拓而西南縮門仍一十有三今杭垣即其遺型也

濬新運河張士誠據杭自吳達浙以濫溪稱便

濫一作瀕

惟五林港以上港道淤隘大軍難行故發民夫二十萬濬成巨河自五林港開至北新橋又南至江漲橋

闊二十餘丈

樓采類編

案張氏濬新運河縣鎮各志均言至正末因附
於此

十二月戊辰吳國公朱元璋命僉院常遇春帥師攻
杭州杭民為奢侈無蓄積城門既閉米旋盡糟糠與
米價等既而糟糠亦盡以油車糠餅搗屑代之餓死
者十六七

二十年三月吳國公召常遇春于杭州遇春之出師
也吳國公戒之曰克敵在勇全勝在謀昔關羽號萬
人敵為吳呂蒙所破為無謀也爾宜深戒之及攻杭
州數戰不利故召還

續通鑑

二十四年八月乙卯張士誠自以其弟士信代達實特穆爾為江浙行省左丞相徙達實特穆爾於嘉興士俊峻垣牆以錮之及江浙右丞達蘭特穆爾飲藥死達實特穆爾聞之歎曰大夫且死吾不死何為遂命左右以藥酒進飲之而死張士信既為江浙丞相建第宅東城下號丞相府張氏諸臣皆起於寒微自謂化為國以底小康亦皆大起第宅飾園池蓄聲妓購圖書民間奇石木必見豪奪士信後房百餘人習天魔舞隊園中采蓮舟楫以沈檀為之諸臣宴樂率費米千石居民趨附之者輒得富貴米幾士信令潘元明守杭而自還姑蘇續通鑑

二十六年九月乙未吳王命朱文忠帥師攻杭州諭

之曰徐達等攻蘇州張士誠必聚兵以拒今命爾等
攻杭州是掣制之也我師或衝其東或擊其西使彼
疲於應戰其中必有自潰者爾往宜慎方略

冬十一月吳朱文忠率指揮朱亮祖耿天璧攻桐廬
降其將戴元帥復遣袁宏孫鳳略富陽擒其同僉李
天祿遂合兵圍餘杭下之謝五與其弟姪五人出降
文忠遂趨杭州未至張士誠平章潘元明懼遣員外
郎方彝詣軍門請納款文忠曰吾兵適至此勝負未
分而遽納款無立計太早乎對曰此城百萬生靈所
繫今天兵如雷霆當此者無不摧破若軍至城下欲

降恐無及，故使先來請命。文忠留之宿，明日遣回報，而駐兵以待。元明即日獻圖籍，文忠至杭州。元明等奉士信所授諸印，并執蔣英、劉震出降，伏謁道左，以女樂導迎。文忠麾去之，止壁震譙，下令曰：「擅入民居者死。」一卒借民釜，立斬以徇。城中帖然，得兵三萬，糧二十萬。執元平章努多長壽等，與蔣英、劉震送建康。甲辰，以潘元明全城歸降，民不受鋒鏑，仍授平章。其官屬皆守舊職。從朱文忠節制。

續通鑑

案潘元明降，杭民不受鋒鏑，而臨平記補遺、歷引明志，至正未，臨平寺院盡燬，以為張士誠往。

來蘇杭臨平實當孔道然張氏襲杭自平望烏
墩水路出發不必經臨平意者楊鄂勒哲由硤
石長安援杭之苗軍或常遇春率師以攻杭者
寺院如此人民蹂躪可知

是月明罷各路總管府改杭州路為杭州府領縣九

錢塘倚仁和倚改縣尹為知縣

明史地理志萬曆志

十二月明罷分省

戊戌年置中書分省治寧越府癸卯年移嚴州至是罷

置浙

江等處行中書省治杭州府授文忠浙江省平章政

事復姓李氏

明史地理志李文忠傳

明太祖洪武三年封定王櫛為吳王建吳王府於錢

塘縣

十一年改封周王遷河南開封府
明史諸王表地理志萬曆志

八年置浙江都指揮使

初名行都督府領杭州前杭州右等

十六衛海寧五所

明一統志

案明制凡軍之政必聽於衛衛下千戶所千戶督百戶百戶下總旗小旗率其伍卒以聽所詳見續文獻通考

九年改浙江行中書省為浙江承宣布政使司直分守浙西左參政

萬曆志

十四年置提刑按察使分浙西東二道兼察諸府衛

所

明一統志
浙江通志

杭州府屬浙西道領縣九曰錢塘煩冲劇仁和煩冲

劇

章潢圖
書編

成祖永樂初置巡撫於兩浙

時遣尚書治兩浙農具
後或巡視或督餼有事

則置杭州府
志明史百官志

按通鑑輯覽仁宗洪熙元年時宣宗即位以大理寺

卿胡椒參政葉春巡撫南畿浙江史稱巡撫始

此自是遇災荒盜賊輒遣大臣往巡撫事已召

還成化以後遂成定員而三司

謂都布

之任漸

輕是巡撫浙江之始又得一佐證矣

武宗正德十一年宸濠令內豎假飯僧聚衆千人於

天竺寺僉事韓邦奇立散遣之

明史韓邦奇傳

十四年秋七月鎮守浙江太監畢真謀舉兵應宸濠

巡按監察御史張縉陰為禦備令管操部指揮使江

洪號令官軍嚴戒各城真謀阻不敢動事

萬曆志

世宗嘉靖二十六年以海警始命都御史巡撫浙江

明史百官志

二十九年海賊首盧七擄掠戰船直犯杭州西興堰

劫略婦女財貨

倭變紀略

三十二年夏四月海賊徐海陳東葉麻壽勾倭入寇

自袁花犯海寧屯赭山前衛指揮陳善道率民兵禦

之戰沒錢塘民錢鉞採鮮至魚洋與倭遇引舟進海
門兵馬司巡撫王忬檄參將湯克寬往勦追及於鼈
子門俘斬二百有奇

杭州府志

三十三年夏四月倭復犯海寧據尖山石墩四十餘
日五月參將盧鏜追敗之賊至此始蕩滅杭州官吏
以烽火不時發日集坊民登陴守多怨苦忬令罷之
是月以倭犯杭州命南京兵部尚書張經總督江南
江北浙江山東福建湖廣諸軍便宜行事

浙江設總督始此

經徵兩廣狼土兵聽用

杭州府志明史張經傳

三十四年春正月倭犯海寧三日掠袁花焚硤石九

日陷崇德、轉掠塘棲、攻德清、回據新市。

仙澤文獻作三十二年正月

月乃三十四年之

議 杭州府志

五月、倭萬餘人犯袁花、掠長安、臨平、至餘杭、二十八日、薄杭州、鄉民避難者號泣城下、有司拒不得入、提學副使阮鶚手劍開門納之、賊肆劫掠村郭、東自江口至西興壩、西自留下至北新關、周四十餘里、燬燄一空、六月六日大風、晚益急、火燄入城、守者不能立、城幾陷、阮鶚僉事王詢竭力禦之、賊始退、七日遣永順宣慰使彭翼南、保靖宣慰使彭蓋臣統兵至塘棲、賊掠官船、冒為軍門、巡視嘉興、調守港兵、迎至落瓜

橋伏發截殺二百餘人翼南蓋臣復失利賊掠練市

而去

杭州府志

案明史張經傳經以待永保軍不即戰為趙文華奏劾帝怒下詔逮經時三十四年五月也方文華拜疏永保軍已至其日即有石塘灣之捷五月朔賊突嘉興經遣盧鏜俞大猷督永保兵會湯克寬舟師合戰於王江涇斬賊首一千九百餘級焚溺死者甚眾自軍興來稱戰功第一為趙文華胡宗憲所攘論死繫獄其年十月與巡撫李天寵俱斬天下寃之乃明史紀事本末

謂李天寵束手無策。張經駐嘉興。援兵亦不時至。遂有致仕僉都御史張濂上言。督撫因循玩愒。養成賊勢。等語。蓋谷氏明紀本末。因張岱石匱藏書編纂。當時杭郊受禍最烈。在浙言浙。客有如嚴嵩所言。江浙人皆言經養寇不戰。文華宗憲合謀進勦。經冒以為功者。自明史出。而是非功罪自明矣。

三十五年三月。倭萬餘人攻乍浦。欲犯杭州。總督胡宗憲調臨安兵駐餘杭。石瀨。雙溪兵駐瓶窰。自引兵壁塘棲。與巡撫阮鶚相犄角。賊分二支。一逕至長安。

一由章婆堰與長安賊會十八日趨皂林游擊宗禮
敗死阮鶚走桐鄉宗憲計曰與鶚俱陷無益也遂還
杭州遣指揮夏正等勸徐海降賊知杭州有備不敢
攻而去五月二十六日賊復由故道抵硤石南入袁花
逼塘棲宗憲遣通事蔣洲等復申前約賊退屯李港
是月宗憲倂陳東平徐海浙倭悉靖翌年冬宗憲誘
降汪直斬于杭州倭據寧波舟山者尋亦揚帆南去
杭州府志
通鑑輯覽

案黃氏遵憲日本國志胡宗憲遣寧波諸生蔣
洲陳可願至日本可願還言抵五島遇汪直毛
海峯謂日本大亂不相統攝須徧諭乃禁遏及

蔣洲還山口守源義長豐後守源義鎮皆遣使謝罪送還被俘人口時宗憲已計擒陳東又招誘汪直直至被擒悉與明史日本傳合則宗憲之清內奸平外寇功在兩浙甚偉康熙縣志載宗憲總制四省塘棲呂需具陳方略宗憲用其謀卒擒海賊汪直當在引兵壁塘棲時也

神宗萬曆十年春三月庚申杭州兵變時朝議汰冗費巡撫吳善言奉詔減月餉三之一東西二營兵馬文英劉廷用等構黨大噪縛毆善言權稅工部主事王謙馳諭乃解丁卯命兵部侍郎張佳允兼右僉都

御史代善言佳允言河南游擊徐景星謀勇請調浙
營許之夏四月杭民復變城中行保甲柵各設役夫
司干擷前歲更其法必以身受役者惰不任率倚有
力以免游手驟失募亦怨上虞人丁仕卿素舞文與
市猾相結會仕卿以事坐法諸大猾嗾衆奪之響應
至千人遂破臺使者門守道而下走匿僅免佳允問
告者曰亂兵與亂民合手曰未也佳允曰速驅之可
離而二也五月佳允至杭州民剽益甚佳允從數卒
問民所苦衆以司夜役告下令除之衆益張夜掠巨
室火光燭天佳允召景星諭二營兵令討亂民自贖

擒百五十人，丁仕卿在焉，斬其三之一，餘悉散歸舍，乃佯召文英廷用，子冠帶而密屬景星捕七人，并文英廷用斬之，馳使赦諸營兵，無所問，衆大安，二亂悉定。

杭州府志

熹宗天啟四年春三月，杭州兵變。

明史本紀

莊烈帝崇禎十七年三月丙午，李自成陷京師，帝崩于煤山，錢塘知縣顧咸建甫之官，戢奸宄，嚴警備，巡按御史彭遇艷以貪殘激變，賴咸建調護，事寧而民

免株連。

明史朱大典附顧咸建傳

清世祖順治二年

明福王弘元元年閏六月唐五月王即位福州稱紹武元年

明南都覆鎮江守將鄭彩等率眾還閩緣道劫掠咸
建出私財迎犒乃斂威去亡何馬士英奉福王母妃
以黔兵為衛經廣德至杭大將方國安兵及朱大典
阮大鍼兵亦至咸建謀於上官先期遣使行賂兵乃
不入城四鄉多被淫掠城中得無擾時監司及郡縣
長吏悉遁竄咸建散遣妻子獨守官不棄

明史顧咸
建傳馬士

英
傳

六月浙西郡縣咸望風下清大軍悉趨杭州明潞王
常芳方流寓于杭諸城聞福王見執請潞王監國不
受不數日清貝勒博洛都統拜音圖阿山次塘棲三

等子哈岱分兵徇海寧甲子進抵武林關潞王從巡
撫張秉貞及陳洪範等計開門迎降尋同福王母妃
北去錢塘知縣顧咸建在籍邵武同知王道焜行人

陸培死之

杭州府志

案棲乘類編清師下江南明將方

或云方汪國安

汪王

三總戎屯兵棲里倚跨塘橋敵樓為險思遏其
鋒至攜李前左都督陳洪範與塘棲吳允淳有
舊寄書致意允淳乃冒鋒鏑晉謁潞藩力言塘
棲不可守暨貝勒威德潞藩悟令撤兵六月十
三日大軍過棲皆囊弓封刀秋毫無犯附記於

此亦縣境上別史故事也。

時紹興諸郡悉望風納款。馬士英、方國安等走錢塘江，蒙古都統恩格圖護軍統領伊勒都齊兩路追躡，敗之萬松嶺及渡口。杭州府志

浙江督標中軍副將張膽討平朱橋、范村寇逆，會勦江東方馬叛兵。乾隆通志

案定鄉小識：山寇柴日乾、崇禎末結黨橫山中，出入警蹕，儀如王者。袁某家索餉不應，掠之去，抽腸死。日乾事他書不詳，其實張膽傳稱朱橋、范村寇逆者，即日乾一流人，而討平日乾等事。

當與會勦方馬同時蓋贍傳於會勦方馬叛兵下即接而叛兵渡江肆虐事則知清師初抵杭城方馬之兵尚逗留江干故博洛即遣將平內寇勦外兵肅清城郊誠戡亂之先著矣

因明制置浙江等處承留布政使司杭州府隸之領

縣九錢塘附郊治府西境仁和附郊治府東境

浙江通志

清文獻通考置巡撫及總督張存仁隨大軍定浙江授巡

撫擢總督先是鎮江敗卒竄走浙濱南屏白塔居民多被劫掠城中率走避村落存仁至傳其薦紳士民

撫諭安定之

乾隆通志

閏六月明故刑部員外郎錢肅樂起兵於鄞十七日奉箋迎魯王以海監國即日移駐紹興進故兵部尚書張國維為少傅武英殿大學士督師江上畫錢塘江為守總兵官方國安亦自金華至七月十一日會師西興連復富陽於潛樹城緣江要害聯合國安及

鄭遵謙孫嘉績錢肅樂諸營為持久計

時士民競起無所期會城

守以外窮鄉僻壤各自為屯仁和有陳萬良龍道士范大倫浙東西同時并起者不勝書方國安

兵至杭州屯朱橋沿江列柵引兵直至六和塔值清游兵出谷口射殺一人明日以兵數千出清風亭副都統珠瑪喇護軍參領武拉禪縱騎衝之國安兵却

越三日清軍分為二、八百騎走清風亭、五百騎走橫山、平明覆之、國安兵大亂、奪舟遁、冬十月壬辰、張國維約諸軍連戰十日於江上、總督張存仁遣副都統濟席哈等督兵禦擊、五戰皆捷、第七戰、魯督師右僉都御史錢肅樂前鋒副將鍾鼎新用火攻、礮及存仁不及咫尺、方元科狙擊倒其馬、方國安率裨將王國彬、趙天祥繼之、清兵不利、敗至草橋門下、肅樂將俞國榮直抵張灣、取軍械以歸、時蘇松嘉湖義兵列營數百、而浙東又建國、杭州孤懸危甚、肅樂請以兵由海道援平湖、使清兵進、退會兩顧、杭州不復能守、可運渡三吳、以窺白下、不聽、會查繼佐言、臨平故大盜陳萬良之勇、乃授萬良平吳

將軍以十八日遣部將徐明發渡江策應萬良方為清兵所圍明發至而免於是魯督師右僉都御史熊汝霖從小壘札喬司至北陸萬良與明發合軍札五杭敗嘉湖道佟國器時二十二日也次日札新市展轉至吳江後軍不繼退五杭復退臨平次日至天開河存仁出兵邀擊汝霖士卒略盡乃還十二月二十四日張國維復分道來窺方國安軍大進西湖國維斷後珠瑪喇武拉禪前鋒參領和託鄂碩總兵田雄副將張杰等分兵截擊國維師潰國安選鋒五千全

沒

鮎埼亭集張蒼水
年譜杭州府志

三年

明紹武二年十一月桂王即位肇慶猶稱永曆二年

二月命博洛為征南

大將軍偕都統圖賴貝子屯齊率師征浙東三月清

兵開堰入江張國維王之仁鄭遵謙率水師乘東南

風拒戰清兵觸之舟多碎失甲士八百人國維乘間

攻杭城不克而還夏四月清軍以巨礮擊方國安營

尉竈皆碎國安欲遁熊汝霖再從小壘渡江陳萬良

進喬司抵德清城下

民兵先潰萬良保殘卒戰翁家

博洛抵杭州時夏旱錢塘江水涸有荷鹽過江者訊之水淺可涉二十八日博洛令圖賴前鋒統領

努山從七條沙上流暗渡方國安棄戰艦宵遁二十

九日晦江上師盡潰六月丙子朔清軍畢渡陳萬良

戰敗臨平，散其衆，而與其黨馬雲龍、范貴及山陰諸生翁思明、壽、易、服、騎、馬、奮、鞭、脫、去。憇富陽之尖山，尋遣思明、雲龍、貴、壽還臨平，發所藏金為清營所覺。雲龍見殺，思明被執不屈，萬良匿餘杭山中，被執死。魯總兵土豪唐彪聚五六千人屯天目，擾昌化，餘杭、瓶窑之戰死者過半，殺清兵亦相當，尋戰於安溪以死。

浙西應魯者咸先後殲滅。

杭州府志臨平記補遺

是年夏四月甲申，免浙江錢塘仁和間架稅。

東華錄

五年

明永曆三年

遣固山額真金礪來杭駐防，掌平南將

軍印，有梅勒夾喇、牛叅、壽官，時八旗官兵鎮守省城。

軍民雜處詔禮工二部擇建駐防營浙撫蕭起元定

於城西一隅築城以居旗民判不相擾康熙初年改為

將軍都統梅勒為副都統夾喇為參領牛永為佐領

浙江通志

案清初駐防擾民之害有三曰逃丁曰緝盜曰

營債皆見於府志名宦傳

一總督趙廷臣疏請駐防收買民人宜令

地方官吏給印契并曉諭諸鄰俾知甯身旗下後或逃歸有容留者方可坐罪一總督施維翰疏請駐防滿兵夜必收營緝盜事專責漢兵一浙撫王國安以杭州兵民雜處營債素為重累乃捐俸代償其餘瑣事姑不殫述

聖祖康熙三年八月明故尚書張煌言被執至杭州

總督趙廷臣羈之於清室九月初七日赴市口占絕

命詞遂受刑。羅子木、楊冠玉從死。僧超直暨杭人張

文嘉等收瘞於杭州南屏山荔子峰下。

張蒼水
年譜

十三年閩逆告變。總督李之芳移鎮三衢。巡撫田逢吉督兵城守。咸以錢塘縣令梁允植為才。命佐軍興。調兵食。給應滿漢大兵。解餉及大炮鉛彈軍器。前後運用船隻計萬有八千餘號。夫役不計其數。俱出召僱。民無怨咨。不數年。逆窮授首。東南半壁得安。柩席。二十八年二月丁未。上臨幸杭州。駐蹕湧金門內太平坊行宮。辛亥。渡錢塘江。舟泊會稽山麓。壬子。上親撰祭文。詣禹陵致祭。癸丑。還駐杭州。甲寅。幸演武場。閱

騎射乙卯自杭回鑾

諭扈從部院諸大臣等傳諭將軍總督等令家喻户晓務使教

本興讓崇儉黜浮
東華錄杭州府志

三十八年三月戊子上幸浙江駐蹕杭州府湧金門

太平坊行宮乙未詔免前三歲逋賦赦殊死以下丙

申幸演武場閱兵親率諸皇子射戊戌奉皇太后回

鑾

東華錄杭州府志

四十二年二月庚寅上臨幸杭州駐蹕湧金門太平

坊行宮閱駐杭官兵等射癸巳回鑾遣領侍衛大臣

阿靈阿等閱錢塘江隄

東華錄杭州府志

四十四年夏四月丙寅上臨幸浙江駐蹕西湖臣民

建行殿於孤山之南。戊辰閱杭州官兵射。

庚午諭福建浙江總

督金世榮浙江巡撫張泰文福建巡撫李斯義浙江本
年地丁又經全免無可加恩浙江福建兩省康熙
四十四年四月初八以前凡犯罪語款不應赦者不
赦外其餘死罪以下已發覺未發覺俱著減等發落

○東華錄
杭州府志

四十六年夏四月甲申上駐蹕杭州西湖行宮丁亥

閱杭州官兵射甲子自杭州回鑾

東華錄

世宗雍正初定衝繁疲難之制杭州府衝繁難領縣

九錢塘衝繁難仁和衝繁難

杭州府志
清通志

十二年置浙閩總督駐福建

案前稱福浙總督或浙江總督駐處亦杭州福

州迭有更改至此始
皆定焉 杭州府志

高宗乾隆十六年三月戊戌上奉皇太后臨杭州

駐蹕太平坊行宮庚子駐蹕西湖行宮幸敷文書院

幸觀潮樓閱兵巡幸紹興東渡錢塘江乙巳祭禹陵

丙午還駐杭州庚戌奉皇太后回鑾

杭州府志
東華錄

二十二年二月乙丑上奉皇太后臨幸杭州駐蹕西

湖行宮禁營伍鏡吹細樂庚寅閱兵禁武臣乘輿三

月壬辰朔免浙江杭州等四府屬十八年至二十年

民欠甲午至觀潮樓閱水師丁酉自杭州回鑾

辛亥
建海

神廟於杭州觀潮樓
○杭州府志東華錄

二十七年三月甲午朔上奉皇太后臨幸杭州府駐

蹕太平坊行宮、乙未、閱視海塘、駐蹕海寧陳氏安瀾園、丙申、駕還杭州、駐蹕西湖行宮、戊戌、閱兵、庚子、免浙江積年未完地丁、屯餉、漕項、并水鄉竈課銀、壬寅、幸觀海樓、閱福建水師、癸卯、臨視織造機房、丙午、自

杭州回鑾

杭州府志
東華錄

三十年閏二月辛亥、上奉皇太后幸浙、閱海塘、駐蹕海寧陳氏安瀾園、辛亥、臨幸杭州、駐蹕西湖行宮、甲寅、幸觀潮樓、閱福建水師、甲子、自杭州回鑾、杭州府志東華錄

三十五年三月辛巳、上幸海寧觀潮、駐蹕陳氏安瀾

園壬午幸夫山癸未幸杭州府駐蹕西湖行宮甲辰

幸秋濤宮閱水師己酉閱兵壬辰自杭州回鑾

杭州府志

東華錄

四十九年三月己亥上幸海寧州詣海神廟行禮駐

蹕陳氏安瀾園庚子幸夫山觀潮閱視塘工辛丑幸

杭州府駐蹕西湖行宮癸卯詣聖因寺恭瞻聖祖御

容行禮閱杭州駐防兵戊申閱福建水師己酉御製

南巡記庚戌自杭州回鑾

杭州府志
東華錄

五十五年頒四庫全書於杭州文瀾閣諭令浙省士

子有願讀中祕書者許其呈明到閣鈔閱但不得任

其私自攜歸錄

東華

仁宗嘉慶五年阮元任浙江巡撫時海盜蔡牽擾閩越疏請建造大船巨礮并籌捕土盜翦艇匪羽翼錢塘江有小舟曰烏鴉船昏暮劫掠廉得姓名捕寘諸法立緝匪章程七則檄沿海州縣力行保甲六年立詁經精舍選高材生讀書其中課以經史疑義及小學天文地理算法其後上舍士致身通顯及撰述成一家言者不可殫述東南人材稱極盛焉

先正
事畧

宣宗道光二十年以劉韻珂為浙江巡撫寧波失守英艘越姚江而西會城大震十室九徙日夜泣諭僚

屬徧謁里居士大夫出資力治守禦具數日稍定誅

賊間十餘人奸人不得逞府志

二十二年夏四月初四日英軍突駕火輪船由錢塘

江欲進攻杭城人心大震既而英軍因江水淤淺失

山脚下鼉子門沙埂墳起不能駛駕遂回帆而去時

參贊特依順自粵來浙與將軍奕經議戰不合遂令

陝甘兵八百人自成一隊駐萬松嶺以防護杭城為

名及英軍闖入錢塘江口將軍部下祇河南小隊兵

二百人遂請特參贊急赴江邊拒敵而特依順不肯

往繼聞火輪退出龕山始徐徐整隊至銀杏埠而英

軍已去遠矣

具青吞
咄咄吟

文宗咸豐十年正月太平軍忠王李秀成為解南京
五次之危由蕪湖破廣德到泗安獨率本部人馬六
七千之衆由廟西到武康二月十七日由梯子嶺至
瓶窰防兵不及百皆奔散十八日走狗葬夜焚良渚
十九日黎明撲武林門官民尚以為土匪統帶寶勝
勇等登城望知為太平軍始閉城秀成遂困住杭州
五門二十五日於南屏鳳凰諸山立十餘營按察使
段光清率清兵及江西勇三路出戰皆敗歷三晝夜
至二十七日太平軍攻由清波門而進

浙江巡撫羅
遵殿寧紹台

道仲孫懋布政使王友端知府馬昂霄仁和縣知縣
李福謙訓導吳麟書典史林汝霖皆死之候選道陳
炳文亦巷戰陣亡是夜仍退出城十八日盡入城恣屠戮死

者填路人馬不能行連戰數日滿營未破時和張兩

帥

和春張國樑

果派江南援軍來救杭州

三月朔提督張玉良乘小舟率

六百入進抵武林頭將軍瑞昌遣王允突圍告急二日玉良全軍抵武林門秀成至杭志在分江南和張之

兵勢今計已中次日午時在杭州新製旗幟以作疑

兵為兵少退兵之計遂自杭郡退出由餘杭過臨安

行天目山出孝豐到廣德約楊輔清李世賢劉官芳

等在建平大會會議之後當即分兵而江南大營官

兵再潰矣

杭州府志李秀成供狀

夏六月太平軍英王陳玉成旁掠臨安十七日破餘杭十九日至賣魚橋巡撫王有齡啟武林門迎勦權布政使杭嘉湖道麟趾率所部驟馬而出適張玉良遣總兵劉季三自石門入出太平軍後遂遁去二十

二日季三拔餘杭塘戰壘薄東南門復其城

杭州府志

秋七月張玉良圍攻嘉興李秀成移兵救之連戰五日分一軍上石門斷浙江來路二十五日玉良自嘉興敗還二十八日太平軍沿運河犯塘棲焚掠一晝

夜而去

李秀成供狀張蓉階營齋日記稿

冬十月侍王李侍賢遣其將自嚴州陷富陽於潛合

象窺杭州將軍瑞昌巡撫王有齡遣傑純吳再升等
迎戰於觀音橋太平軍繞古蕩駐秦亭山十四日分
兩隊入犯副將文瑞出擊敗之軍功王應棠部西湖
水勇及文瑞礮船勇登岸抄截擒斬甚衆十五日文
瑞由保塔襲賊壘傑純吳再升等揮戈陷陣斬黃衣
者二迺傾知備禦嚴縱掠而去十六日麟趾率兵追
至山墩十二月太平軍復入富陽張玉良自桐廬引
兵追擊太平軍游掠至界牌定鄉圍長駱儒宗率衆
殲其前隊迺折還復於江口編竹筏乘夜襲營水陸
各軍夾擊敗退

杭州府志

十一年二月嘉興太平軍寇海寧吳再升自石門潰走喬司太平軍掠臨平而去再升遂扼臨平斷橋以守海寧西北陣地俱沒自此省城孤立外府縣除湖州外已全陷

杭州府志李秀成供狀

秋八月李秀成與主將童大路自分水竄昌化九日再陷餘杭遂調嘉蘇主將陳炳文郅永寬合圍杭州二十三日游騎至山墩二十五日秀成率衆出餘杭塘撲賣魚橋營卡夜半乘大雨渡南岸都司邱壽昌退至務橋秀成軍趨東鄉獲刈禾稻二十七日以提督饒廷選城守布政使林福祥率所部定武軍三千

人連營望江門外衛江路。冬十月朔，太平軍自孤山趨南屏，乍浦副都統傑純率西湖水軍斷玉帶橋，以礮船前後擊之，迺走九里松，出朱橋，入平江堡。二日，童大路自清泰門突至羅木營，林福祥營壘不成，副將楊金榜、王振聲率振威、威武兩軍屯饅頭山。金榜督軍出擊，振聲不能守，陳炳文自鳳凰山撲之，營陷。大路、炳文夾攻金榜，榜軍潰，自剄，復遭慘戕而死。時饒廷選率所部二千人陣於萬松嶺，見太平軍幟，倉黃入城。五日，張玉良至自富陽，總兵文瑞踵至，力攻羅木營，自辰至酉鏖戰六時，太平軍退舍，文瑞整衆。

入。玉良遣副將况文榜齋書有齡移軍城外，聯絡為壘，備蘆蓬藁席，棲兵士，饒廷選期以明日。太平軍一夜增壘數十所，內外遂絕。復自海潮寺至鳳凰山，環木柵為長圍。玉良屯江岸，逼潮汐，禱於海神，營始立。屢出銳攻敵壘，貴廷芳率礮船晝夜轟擊，弗克。十九日，玉良中礮，斷脛卒。城中奪氣。十一月，城中糧盡，胡允基集錢十餘萬，無米可購，飢民食草木皮革皆罄。或割死者肉以食。七日，兵食亦盡，碾義倉穀雜豆麥以濟。九日，童大路遣隊長給降。林福祥給黃金二百，軍犬號衣，翎頂若干，約四鼓，獻海潮寺，至期往，彼伏

以待我軍傷亡大半失護城壘三迺薄候潮門通鳳山門空心臺礮裂堞崩衆蜂擁而上副將曾得勝營臺側掇出死鬪城上兵應之太平軍遂改是日武林錢塘清波門外各營皆降太平軍十日饒廷選令括民間米穀林福祥部兵乘間攫民財十四日殺戰馬及放生園牛羊鹿豕餉士卒有齡自食糠覈林福祥以下家人日食粥軍士日剽掠城中大亂城之初圍也民家簞食壺漿供奉城上芻茭楨榦踴躍備應至是闔戶自戒路無行迹矣二十七日湧金水營毀升用縣馮佩珩死之二十八日壬子守城軍各潰散太

平軍於巳刻梯城入遂陷有齡文瑞胡元博學政張

錫庚按察使寧曾綸糧道暹福道員彭斯舉朱琦仁

和知縣吳保豐皆死之秀成入城以禮殮有齡暨錫

庚文瑞

尋遣林福祥及杭嘉湖道劉齊昂送之上海江蘇巡撫為易棺成禮面皆如生

十二

月朔滿城亦陷瑞昌縱火自焚傑純力戰死之全城

皆殉先是秀成與瑞昌約願放其全軍回家免傷男

女老小生命并給舟隻許帶金銀送到鎮江而止瑞

昌不信開槍擊斃太平軍遂攻內城內城既陷秀成

傳令諸將凡獲有滿州兵將者不准殺害時官吏自

饒廷選以下五六百員無一得出居民六十餘萬半

己餓死。秀成於候補官員給費放回。將校則應從不應從。安排定奪。并將省內難民一一安撫。餓死者發薄板棺木萬有餘箇。難民無食。即到嘉興載米苧石。載錢二十萬來杭救濟。自此杭州全陷。惟武林港口。

一壘恃湖州援最後散。

杭州府志李秀成供狀

穆宗同治元年夏六月。太平軍保王童大賂聽王陳炳文構隙。率黨攻主將鄧光明。焚郭郭而去。

杭州府志

案太平軍設置地方官吏。有軍帥。師旅。帥司。馬百長等名。城守者曰主將。局所曰卡。蓋以軍事攝理民政也。故老相傳。惟捐稅是徵而已。

二年八月官軍克富陽太平軍奔餘杭布政使蔣益
澧追薄杭州命提督高連陞等軍朱橋總兵劉清亮
助道員康國器魏喻義攻餘杭自駐留下策應陳炳
文方援嘉興聞之倍道馳回召欽王謝天義康王汪
海洋併力踞餘杭自倉前長橋女兒橋縱至北新關
橫至古蕩連營四十里拒官軍二十四日高連陞攻
平江堡總兵王月亮依山列隊水師副將楊政謨劉
連陞率水師沿江下黎明入其壘太平軍殲焉城內
太平軍突出萬餘連陞縱令逼近迎戰王月亮橫出
抄之楊政謨劉連陞發礮環擊追逐入第二重卡斃

其衆并斃黑夷一。太平軍退入城。二十六日。益禮令高連陞等節節移營。進屯萬松嶺。自率徐文秀及馬隊趨法華山。嶽廟覘形勢。奪卡三。九月六日。太平軍由雷峰塔。鳳凰山。撲新壘。高連陞。王月亮。副將劉清望。游擊余朝貴等合擊敗之。陳炳文。鄧光明率其黨扼饅頭山。別遣驍將伏梁家南新裕街市。連陞。清望掩至。炳文驅衆反撲。伏兵齊出。鎗發如雨。王月亮從九曜山。萬松嶺衝入陣腹。鎗傷光明。光明不支。始狂奔。官軍直至城下。八日。益禮令王月亮軍天馬山。游擊寧世杰軍南屏山。羅山。綱軍翁家山。高連陞等列

陣為備。壘成。太平軍不敢逼。益澧於留下。獲小船三十。製礮船。布萬春廟。楊家橋。何母橋。蔣村各隘。十三日。太平軍於楊家橋築壘。徐文秀乘夜攻之。遂走。渡河。擒其卒。言欽王在餘杭中礮死。是時官軍攻餘杭者亦薄城下。冬月。汪海洋迭犯何母橋。十六日。益澧令副將周廷瑞。都水王東林。屯天水橋。參將鄧受福。屯護國橋。十七日。令副將劉樹元。築方家太平橋。二壘。十八日。長橋。女兒橋。太平軍復窺何母橋。攻不克而退。是日。杭州太平軍乘大霧。由萬松嶺。撲都司張志公壘。守備丁賢發。率副湘後營。從山巔馳下助守。

高連陞總兵德克碑

佛蘭西人

兩路援之張志公開壁搏

戰德克碑令淺水輪船燃開花大礮揚政謨劉連陞

擊沿江之太平軍三月亮擊清波門太平軍俱截回

十一月二十五日蔣益澧自餘杭還留下十二月朔

益澧令高連陞德克碑會水陸各軍攻鳳山門壘自

率馬步軍列秦亭山棲霞嶺高連陞等數道並進自

辰至午克九壘揚政謨劉連陞等攻候潮門石壘亦

克之高連陞分所部據其五德克碑據二惟古蕩未

拔益澧令各營分踞饅頭山雷峰塔秦亭山為壘徐

文秀移攻古蕩閩浙總督兼浙撫左宗棠檄總兵劉

培元統所部水師入錢塘江助勦。六日太平軍夜撲

棲霞嶺羅山網壘。山網擊敗之。八日劉培元令參將

蔣榮彩、劉仁和等拽舢板自慈雲嶺入西湖，獲其礮

船三、划船十。

二十五日黃少春攻
瓶窰焚五卡而返。

二十七日古蕩太

平軍撲秦亭山，高連陞擊敗之。

杭州府志

三年春正月二十五日高連陞會劉連陞、德克碑攻

克望江門石壘。三二月二十一日蔣益澧令高連陞

劉清亮、劉連陞攻觀音塘拔壘二、德克碑自饅頭山

發大礮毀鳳山門城垣三丈。丁賢發及洋兵狼狽而

進。益澧督大隊赴之。太平軍恃鎗礮力拒，傷軍士百

連陞等俱裏創周廷瑞徐文秀攻古蕩未下旁攻葛嶺克之各壘皆奔潰參將曹魁甲入古蕩徐文秀周廷瑞及王東林進克松木場馬塍壘二二十三日益澧令徐文秀等攻湖州市劉清亮等擊其援兵蔣榮彩攻錢塘門高連陞德克碑攻鳳山門王月亮攻清波門劉連陞水師游擊布興有等攻望江清泰門益澧自率親兵趨武林門督戰徐文秀周廷瑞攻左宗橋壘屢上屢蹶陳炳文率驍銳萬餘出援劉清亮王東林率衆遮截城中又出援兵益澧令都司謝茂勝率洋鎗隊逼門圍擊太平軍傷多不敢出炳文力

戰不退。徐文秀傷於矛，士卒亦多傷。薄暮乃息。清波、錢塘、清泰各門附城壘皆未克。柄文精銳盡喪。是夜潛向德清、武康而竄。比王錢貴仁納款，率眾降。益遣令徐文秀、劉清亮等從武林。錢塘門衝入，高連陞等各梯城進。二十四日甲午，復杭州。是日黎明，汪海洋亦走，遂克餘杭。羅大春等追至瓶窑，守壘者尚拒戰。宗棠自率親兵馳至。次日，遂克安溪關。

杭州府志

閩浙總督兼署浙江巡撫左宗棠以全浙底定，於是減浮收，定漕額，靖搶船，定兵制，頒籽糧，募墾闢，行之數月。浙人大蘇。若忘兵革。十一月，以浙江布政使蔣

益澧護理巡撫籌辦善後百廢具舉農商相率來歸

首重學校優其廩糈設義學復貢院杭州知府薛時

雨益貸官中金錢築廬舍四方漸歸有所棲託杭州府志

德宗光緒二十一年三月中日訂定馬關和約杭州

關為通商口岸十月巡撫廖壽豐奏明開辦商埠會

勘界址勘得杭州武林門外南自拱宸橋起北至五

杭州府志

二十二年五月設立洋關以杭嘉湖道兼充杭州稅關並

督洋關建於拱宸橋外與馬路八月二十五日開關

訂定通商場地共計一千八百九並日本商民居住

塞德耳門章程十月巡撫照復英領事請劃英租界

地段

杭州府志

二十三年八月巡撫核定通商場設立巡捕房章程

又核定杭州通商場租地章程

按此為各國通商場租地章程與前訂塞

德耳門章程大略相同 杭州府志

是年巡撫廖壽豐奏於杭州設求是中西書院並設

工藝廠及武備學堂其開辦絲紗廠蠶學館領培茶

新法試行內河小輪設銀元局亦分年依次成立

杭州

府志

二十八年五月仁和高等小學堂開學八月錢塘高

等小學堂開校兩學堂由紫陽崇文兩書院改設經費均由兩書院原有歲修膏獎各款撥用至三十一年詔停科舉於是兩縣之城廂鄉鎮更廣興學校矣 杭州府志

案甲午戰後朝野始議圖新戊戌變法旋遭阻遏自庚子拳匪之亂東南各督撫雖與各國訂約保護長江內地不預戰事然人民智識低下通國咸知於是提倡教育之議日起錢塘仁和兩高小遂以此時成立焉

二十九年十一月商部奏定商會簡明章程及附則踰年杭州總商會成立於是城北商會及仁和縣塘

棲鎮商務分會亦依次組成法規大全

三十一年六月浙人會議籌辦鐵路拒絕外款公舉

開缺鹽運使湯壽潛為總理候補四品京堂劉錦藻

為副總理并電政府廢與英商所訂草約改歸自辦

三十二年九月二十八日江墅線開工三十三年六月十五日江墅線開車宣統元年七月杭州至楓涇

全線開車滬杭自是接軌杭州府志

八月詔停科舉改學政為提學使高等專門師範中

學等校依次成立仁錢兩縣有小學二十六所內附

郭者三所鄉鎮者三所皆三十三年十月以前立見仁錢勸學所總董范耀雯報

告杭州府志

三十二年改浙省保甲總局為警察總局尋改為巡警總局專辦省城巡警創設全省警務處附設警務研究所為各府州縣城鎮鄉普及辦法

杭州府志

七月仁錢教育會成立十月仁錢勸學所開辦

至宣統元

年十二月就原有小學外又勸辦小學三十六所內鄉鎮二十所

杭州府志

宣統元年正月以憲政編查館頒行分年籌辦事宜定本年諮議局選舉及籌辦各州縣地方自治并設

立自治研究所

杭州府志

二月浙撫增韞奏設巡警道以原設之全省警務處歸併巡警道辦理遵照部章改為警務公所踰年正

月、省城巡警總局添長警八十八名、分佈上中兩城、

各屬鎮埠已辦巡警處所、如仁和縣之塘棲、寬橋兩

鎮、錢塘餘杭縣之瓶窰鎮、均派副巡官前往整理、浙

西水巡、僅仁和等七廳縣、設有巡船三十隻、長警百

四十餘名、通飭儘力擴充、增有淺水兵艦四艘、往來巡緝浙西匪盜為之斂迹

九月初一日諮議局開會、舉定陳黼宸為正議長、陳

時夏、沈鈞儒為副議長、開正式會議二十八次、合官署與諮議局提出之議案共

五十六件、經議決呈報二十七件、浙撫批准公布施行者十有七件、待奏咨定奪者一件、杭州府志

是年、綠營現存官兵一律裁撤、按光緒三十三年陸軍已編一協、續擬編

成一鎮、杭州府志、法規大全、

二年正月裁仁錢兩縣民壯等費移辦巡警

仁和縣民壯三

十名常年實支銀一百八十兩達間年實支銀一百

九十五兩又塘棲弓兵十六名常年實支銀五十七

兩六錢閏年實支六十二兩四錢錢塘縣民壯工食

每年額支銀一百八十兩由巡警道詳裁移辦巡警

中華民國紀元前一年宣統三年九月浙省革四月

自治籌辦處詳請仁錢兩縣自治會合併設置其參

事會及董事會則分股辦理杭州府志

閏六月內閣奏准裁各省府治首縣歸併府轄浙撫

增韞因通飭各府於七月二十一日實行歸併杭州

府知府英廉遵飭將仁和錢塘二縣撤歸併府轄其

時各省並未通行浙江方值水災官紳皆以歸併室

礙遂請緩行

杭州府志

九月十八日

國曆十一月九日

浙江光復浙軍都督湯壽潛

併仁和錢塘為杭縣改知縣為民政長委汪欽任之

新纂

杭州光復雜記

光復會成立在民國前八年會長蔡元培實際在徐錫麟陶煥卿秋瑾會員浙江較多黃郛吳恩豫呂公望夏超都是曼殊大師亦在內機關在營廣雲客棧同白雲庵與同盟會合併是後來在東京決定的合併後會裏工作仍然進行直到民國元年由于首腦

人物相繼物故才停活動

光復會有徐錫麟之殺恩銘熊成基之襲安慶近之
攻上海復浙江下金陵則先復新舊部人皆與有力
人和火腿行是上江革命同志的秘密集合所在及
諮議局鐵路公司都是革命大本營

辛亥九月十四夜裏三更相近陳幹卿

寧波人

投二炸

彈燒撫署

由國醫李綱索領導到一家後樓貼近撫署擲去

各路別動隊都

向撫署殺去城外饅頭山新兵也用火車頭撞開城
門衝進撫署及旗營圍住五更臨時都督童保煊安
民告示出來機關在杭州城站樓上天明滿街臂上

都纏白布。杭州全城光復，惟旗營尚有激戰，幸而瑞將軍與增撫台知大勢已去，不可抵抗，遂和平投降。
卅七年，雙十節大同報。清廷遜位諭旨，在宣統三年十二月二十五日，即民元二月十二日。

附錄

市縣劃界

一節錄三十七年十一月二十五、六兩日，拱埠滄桑史暨劃界情況見大同日報。

清光緒二十一年三月，我國被迫訂定馬關條約，杭州闢為通商口岸。是年十月，巡撫廖壽豐奏明開

關商埠會勘界址。勘得杭州武林門南自拱宸橋起，北至瓦窰頭，直徑三里，橫約二里。拱埠自關商埠後，漸為帝國主義者所注意。那一年的七月，清督辦洋務局會同日本駐杭領事小田切訂定通商地界，共計一千八百零九畝二分六毫，劃分七十四段。於八月二十一日繪圖簽押。一、租界地界西以運河為界，起自長公橋沿南迤，長三百六十丈為止。北以一溝從運河分流，經橋南石橋，注於陸家務河為界。同時議定日本商民居住塞德門章程十三條。日本在拱宸橋之設立租界，以此為雛型，以後得寸進

尺到光緒二十三年四月小田切又與杭嘉湖道王祖光強迫續訂章程五條會審公堂即在那時成立。市政府為了復興拱埠曾敦促兩路當局重建杭拱支綫并在十年建設新杭州計劃圖案中把拱埠列為首位工業區。

戰前杭縣建府在市區井亭橋民國元年對拱埠亦不怎麼需要勝利後井亭橋成了一片荒地縣政府流浪在湖墅清朝寺牌樓某民房裏偏居一隅日夜不安而井亭橋基地又給市府暫時租用去了為了爭奪井亭橋荒地兩杭不知道往來多少公文費了

了多口舌，由兩杭本身鬧到省裏，再鬧到中央，為了免去紛爭，下了一道電令，說是地乃公有，不得擅爭。於是市政府乃根據公有土地管理辦法，呈請中央撥市應用。一面又慫恿杭州第一紗廠和市銀行在荒地上建築大廈，以作一勞永逸之計。縣參議會為此，乃於本年暑假中國酒家招待杭市記者，要求公斷。縣民甚至想用流血方法奪回這縣廨所在地。後來幾經折衝，終由市府撥拱埠一隅，互相交換。

當民國十六年二月，杭州設市之際，為了要符合人口條件，那時市區範圍，自北至西鎮義橋，東至窰橋。

宣家埠南至對江西興西南至凌家橋與留下西至
勾莊三墩同年十二月中央將杭市杭縣區界正式
核定北面由義橋南退至三里漾現為市區界東面仍為
笕橋宣家埠縣市界綫從育字牌海塘直出現為市南
縣區界
面由西興縮至錢江北岸西南由凌家橋退十八里
至六和塔另由留下退十五里至古蕩現為市西由
縣區界
三墩退八里至小河至於拱埠方面以湖拱公路與
運河啣接為界拱宸橋東為市區橋西北首紗廠屬
縣紗廠對面一排小店屬市到民國二十五年杭市
計劃設置九溪公園當年市縣雙方重行會勘決定

杭市南面的六和塔市界推進到梅家塢把梵村雲棲和江心的大刀沙劃入了市區以上市縣區界載明冊籍

抗戰期間杭市淪陷市縣界限事實上已混成一片為了環境當時杭縣縣長陳純白乃把大刀沙拱竿紗廠對面一排小店和小河對面屬杭市的一小角形地帶均有數百民戶都劃入了縣區這里便隱伏着界址之爭的導火綫了

市淪陷期間笕橋機場被日軍擴充了一倍原僅成了現狀杭市第七區第二十一保保民原都住在市

區邊境的，因為住墾地的都被日軍圈征，迫於槍刺誰也不敢反抗，大家就向北遷移。這一移，第七區二十一保全都住到杭縣邊境上去了。勝利復員後，杭市七區二十一保首起糾紛，他們對杭縣拒不納糧，認為戶籍既列杭州市，全保保民所居的地方，自己也應該劃市轄。直到去年八月，由前民政廳長阮毅成出面調解，結果由杭市和杭縣兩政府合同民意機關，雙方組織了一個縣市劃界委員會，劃定如下：

(一) 笕橋宣家埠市縣界綫，仍自育字牌海塘直出，移居杭縣境界的七區二十一保保民，戶口仍寓杭市。

至所耕種地應向杭縣納糧。(二)大刀沙還給杭市。(三)井亭橋杭縣舊址既歸市管為了補償杭縣損失同時為了解除縣府的水電困難將拱埠第八區第十五保所屬水警廳舊址一方劃給杭縣建治拱埠對面一排小店以及小河對面之三角地區劃歸杭縣可是直到日前據說杭市第七區二十保保民還是抗不納糧而拱埠水警廳舊址因居民的堅決反對杭縣縣政府至今尚未經建治糾紛一直懸着未決醞釀到最近已爆發至正面性衝突了杭縣參議會因界址糾紛且曾遷怒到現任張縣長一致認為杭

市政府既將井亭橋府址雀巢鳩佔，而撥拱埠一隅以補償損失，又遲不實行，殊屬非是。於是在上月初，張縣長向省府提出了一張意見書，說杭縣稅源缺乏，而且沒有一個比較適宜建治的鎮，請求把拱埠劃歸杭縣。接着省府會議通過，拱埠劃給杭縣，並令飭杭市杭縣雙方遵照所規定的市縣界綫，如次京杭國道由杭州至小河站，向北沿運河至登雲橋，折向東沿運河支綫，經河水木橋至姚家壩，再轉向東北，沿上塘河經皋亭壩，至豐隆橋，直出。以上在公路以西，及水道以西，與以北地區，一起劃給杭縣。杭市第

八區所留下的僅是仁和倉前與湖墅而劃給杭縣的是拱埠全區佔地二萬五千畝即第八區自十二保到二十二保共計一百四十九甲三千四百四十二戶一萬四千一百二十九人

杭縣縣政府在接奉省府劃界命令後即擇定本月十一日為劃界的日子事前函請市府派員會勘並呈請民政廳派員監督進行一方面杭縣已準備將未來縣治設在江海關舊址現為省農改所的房屋中縣警察局則設在省會警察局第八分局中

前天記者特此為這樁劃界糾紛到拱埠去訪問幾

位縣參議員和張縣長。張縣長說：八區市民的堅決反對，他看得很明白。從人情上講，一個人做慣了市民的，誰願意再做縣民呢？但只要理智一點，市和縣根本沒有什麼不同。同屬浙江，又何分彼此？杭縣在拱埠被管理，由原很簡單。張縣長把上省府的意見書拿出給記者看，上寫道：杭縣原為仁和、錢塘兩邑舊地所合併。自民國十六年以其城郊中心地帶劃建杭州市後，縣轄土地環於市區東北西三面，仍不能以市區為其政治經濟之中心。故縣治依舊設在市區井亭橋畔。抗戰期間，該處府廨燬於兵燹，勝利

以來終以民力未蘇恢復不易迄今尚寄居市隅之湖墅以為臨時辦公之所惟縣政當局及地方人士深以治基未立不僅機關分散縱橫失其聯繫且與治土睽離官民每多隔閡要求提高行政效率則建治實為第一之要圖然以杭縣內境內人口較多並較商業基礎之地點而論如塘棲臨平瓶窯三墩良渚留下等處或交通欠暢均不適為治基是以一致以為縣治必須設於毗連市地始則以收樞紐之效故咸認拱宸橋地方實為杭縣最理想之建治基地蓋拱宸橋位於杭市之北其地三分

之一原屬杭縣。若就整個地形觀察，適為杭縣全境中心。該處交通方便，過去商業頗為繁盛。戰後以良拱鐵路已燬，大見衰落。但曠地極多，街道亦寬，極便未來建設。尤河西及舊日本租界地，已建有工廠數所。粗具工業區之規模。以此為杭縣治基，至稱允當。

二、拱埠劃歸杭縣部份界綫業經履勘完竣。錄三十七年十一月二十八日天行報

杭市拱宸橋第八區十二至十六等五保，經奉令劃歸杭縣設治管轄。並於昨日（二十七）由杭市縣雙方履勘界綫完竣。至雙方有關交接事項，定明（二

十九日 下午二時在市府開會討論劃定界綫範圍如下

(一) 運河東岸即杭市第十二至第十四保界西自康家橋下小河流出至運河沿中心綫北上至登雲橋沿登雲橋河東至戚家橋(即七家橋)再折北沿小河經茶湯橋直至舊日本租界原址兩河交叉點折西沿大家秧田旁小河直西至運河迄長公橋(即柴公橋)為止

(二) 運河西岸即杭市第十五十六保界自康家橋沿運河至拱宸橋再向西原市縣界綫拱三段公

路順向南折西沿河經長春橋嚴家橋直西順原市縣界綫南灣轉東南沿小河原市縣界綫至康家橋

(三) 以上以河流為界者均以河之中心綫為界

(四) 立標石地點甲康家橋乙登雲橋丙戚家橋(七家橋)丁雲家角附近兩河交叉處戊長公橋(即柴公橋)

(五) 上列界綫經蒞場人員根據市縣圖冊協議決議不再履勘報省府呈報備案

拱埠將闢魚市場并設置杭縣縣中
二月十七日來
南日報

杭縣縣府遷治拱埠後七日在海關舊址舉行記者招待會張丹崖縣長主治報告(一)縣府開始拱埠組織自治機構業已召集地方人士舉行座談會決定着手組織拱宸鎮公所與鎮民代表會並先成立籌備機構至杭市第八區十二保起至十六保之戶籍冊定今日接收(二)接收之拱埠一切兵役賦稅等行政設施仍依照法令與杭市成規辦理已公布周知(三)俟接收貧戶各冊後仍賡續舉行平糶(四)今後省

府如在省會興辦之各種示範事業時，仍將拱埠列入以上二、三、四、三點，已經省政府陳主席批准照辦。再拱埠已於七日下午組織建治委員會，將籌款先修馬路。縣府決定今後在拱埠設置縣立中學與縣立醫院各一所，並將開闢一魚蝦市場，供應杭市需要。又訊拱埠第十七、十八、十九、廿一、廿二等五保保民仍向杭縣府請願，要求免劃杭縣管轄，並已組織聯誼會，將晉京請願。杭縣籍省參議員鄭徵明正奔走縣府，與保民間進行調解中。據稱縣府已允將該五保暫不劃歸杭縣轄。